

zuzendariari

(0034) 943 300 222



zuzendariari@egunkaria.com



Martin Ugalde kultur parkea 20140 Andoain

Gerrarik ez

Juan Izagirre (*Gerraren aurkako Gernikako plataformako kidea*)

Irakiarrak zerura begira daude, etsipenez, aspalditik iragarritakoa noiz beteko den beldurrez. Gernikarrek ere goitik datorren izu mota honetaz asko dakigu. Horregatik, bonbardatua izan den herri honetatik ezetz esan diogu gerrari. Badakigu eraso horiek dakarten hondamendia (heriotza, suntsipena), eta badakigu, baita ere, komunikabideek zer mezu zabalitzen duten (gezurra, zalantza...)

Iragarritako eraso honetan, hildako kopurua ere iragarri dute. Kopuru honi aurreko gerran erailak izan ziren milaka irakiar gehitu behar zaizkio, eta blokeoak eragindako 1.500.000 lagun hilketa.

Sasi-aitzakiak erabiliz, eta jantxakurren laguntzaz (Aznarren kasua), geoestrategikoki ona den guneaz jabetuko dira AEBak. Indar militarra erabiliz, mundu mailan duen nagusitasunaren erakustaldia emango dute, eta, hori guztia, nazioarteko ebazpenen gainetik. Nagusitasuna areagotzeko makineria olioztatuko duen petrolioaz jabetu nahi dute.

Petrolio bakearen truke; petrolio sendagaien truke; petrolio Mendebaldeko babestearen truke. Mamuz beteriko mundua irudikatu dute. Justizia soziala hankaperatu duen ekonomiaren egonkortasunaren izenean gobernu eta lurraldeen desgonkortasuna bilatzen dute.

Betiko munduaren adierazgarri da gauzatzearen dagoen eraso hau, eta beste-lako mundu bat posible dela sinesten du-

gunok aukera dugu indarrak batuz, *Gerrarik Ez* aldarria zabaltzeko. Gizartea mobilizatuz lortuko dugu neoliberalismoaren basakeria hau gelditzea.

Legitimitate barik Nafarroan

Erramun Gerrikagoitia • LEKEITIO

Guziok ba dakigu nola armen bitartez konquistaz invaditutako Herri batean sortzen den aginte arrotza izan litekeen gogorra, krudela eta tzat imperialistak ezin efektiboagoa, baina nekez legitimoa. Nafarroan ere Espainiak eta Frantziak inposatzen deraukuten legalitatea ez da ezelan legitimoa. Nafarroa izan da (zen) konquistatua 1512 urthean, aitzinagotik ere galdu zituen armen bidez Nafarroak

1200-ean zathi galantak (galdurik okzidenteko lurraldeak: Araba, Bizkaia eta Gipuzkoa), eta lehenagora retrairiturik historian Nafarroari khendu zitzaizkion 1130 aldean Errioxa eta Bureba, eta 1150-ean orienteko eremuak, Aragon. Armez eta konquistaz guzia ilegitimoki. Ez ziren izan alferrik lehenago ere isuri odolak' an Atapuerca-ko (1054) eta Graus-ko (1063) bataillak. Ahanzten ez ditugula gainera Pyreneo mendiez ipharraldeko sailak, h. d., Bearn, Bigorra, Foix eta Landak raino Bordele. Egungo egunean absentismo eta desmemoria historiko kolektibo bortxatuak ez du balio nola-ere historian aitzinetik deus pasatu izan ez balitz bezala. Nafar patriotismoaren vanguardiaro eroriak ez ditugu ahanztiko; Nafarroak, zauri gaitz ederrekin hori bai baina, ba dirau zutik.

montxo



galdeiozu... ?

hirusta

Edu Zelaieta



NAGORE ARANBURU

Aktorea

Zer iritzi diezu Espainiako aktoreek gerraren aurka egin duten protestari, ondoren jaso zituzten kritikei...?

Xabier Goikoetxea (Durango)

Protesta egin dutenetako bati irakurri nion, harrituta zegoela halako *boy scout* eskaera batek sortu duen iskanbilagatik. Esandakoa baina azkure gehiago sortu du oraingoan, nork esan duen. Kolektibo honek oihartzun handia du hedabideetan, eta pena da, baina ez da Andaluziako nekazariak hitz egin balute bezala. Espainiako Gobernuari grano bat atera zaio, eta granoak, osasunerako arriskuak ez izan arren, beti molestatzeko dute.

Otsailaren 18tik aurrera **Juantxo Lopez Uralde • Greenpeaceko Espainiako arduraduna** izango da Galdeiozu ataleko gonbidatua. Bidali zure galderak ordurako. galdeiozu@egunkaria.com



Hondar bortz asteotan

Teknologiaren aitzinamendua edo gure hizkuntzaren normalizazioaren ondorio izanen da, beharbada. Ez dakit. Kontua da Nafarroako (gizarte baten zati den) euskara aztertzeke Gasteiztik Bilbora joaten aritu naizela hondar bortz asteotan, Plaza Barriko Azkue Bibliotekara hain zuzen.

Bitxia da zein agudo sortzen dugun gizakiok errutina. Zazpitan ernatu, zortziak laurden gutitako autobusa hartzeko (kasik egunero erdietsi dut). Gaur goizean ere beteta doa. Langileak, ikasleak, bertan paperen bat egin behar duen norbait eta ni. Poligamia xelebrea! Goizeroko jendea goizeroko lekuan jartzen dela ohartu naiz. Gaur ere lo gelditu dira azken bortz asteotan lo gelditu direnak. Hori ere ohitura kontua izanen dela pentsatzen dut, nik oraindik emozio pizar bat sumatzen baitut barrenean. Akaso bertze bortz bat aste egingen banitu...

Dena den, zein aberatsa izan zaidan Gasteiz-Bilbo konexioa! Autobusean aspalditik ikusi gabeko lagun frankorekin topatu bainaiz, horiekin guziekin 50 minutu inguruko solasaldi atseginak izan ditudalarik: artisten eta poeten egozentrismoaz, institutu denboraz, unibertsitateko hezkuntza sistemaz, euskaltegien etorkizunaz, gizarteaz, mendiaz eta abarrez. Gero, Bilbon gosalduta ondoan, Azkue Bibliotekara. Han ere bertze lagun batzuekin topatzeaz gain, bertze pertsona batzuk ezagutu ditut. Hemendik mila esker hirugarren solairuko Azkue Bibliotekako bi bulegariei, behin baino gehiagotan erotuko banituen ere, irribarrea aurpegitik behin ere kendu ez zaielako.

Gaur San Balentin omen da. Badakizue, opari bidez zuen maitasuna adierazteko eguna. Hala ere, nik nahiago nuke munduarekin hondar bortz asteotan izan dudana maitasuna egunero banu. Oparirik gabe.